

Alvin Koolman, miembro team negociador di Aruba

Pa Citgo y Venezuela Aruba su refinaria ta hopi importante



ORANJESTAD(AAN): Minister di Asuntonan Economico ing. Mike de Meza ta hopi positivo cu pa fin di maart Aruba por yega na un acuerdo final cu Citgo, cu ta interesa den lease e refinaria situa na San Nicolas. Ora yega na un acuerdo, pa luna di April caba por cuminsa mira movicion pa lanta e planta na un nivel back di operacion. Esaki ta e mesun pensamiento di Alvin Koolman, un persona cu hopi experiencia acumula riba e tereno aki y kende a haci su mesun estudio riba con miho e refinaria aki por funciona.

Gobernacion di Gabinete Mike Eman II a lanta un comision pa sondea e posibilidad pa un reapertura di e refinaria y tuma un decision final di kico ta bay haci cu e area na San Nicolas. Na momento cu a lanta e comision aki, a percira pa inclui Alvin Koolman, kende no solamente ta un Arubiano, pero cu hopi conocimiento den e refinaria y su posibilidadnan.

Awor t'asina leu cu Aruba ta na punto di un decision importante cu Citgo ta bay tuma. Loke cu ta importante den tur e procedura pa habri e refinaria ta cu "Aruba no ta negociando cu lomba contra muraya," Koolman a expresa den un declaracion duna. A cuminsa e negociacionnan a base di e "settlement agreement" cu a duna Valero durante e prome periodo di gobernacion di Gabinete Mike Eman. Den e acuerdo ey ta consisti di acuerdonan a base di cual lo por traha den un economia moderno internacional.

No solamente Aruba no a negocia lomba contra muraya,

pero a negociacion cu e pais teniendo un bon posicion pa diferente motibo. Venezuela tin un problema grandi di liquidez y Citgo, cu ta un compania cu por bende su crudo, mester di un upgrader pa por bende e crudo. E crudo di Venezuela ta uno pisa y no ta conta cu mucho interes den mercadonan internacional. Una bes cu e worde procesa den un crudo sintetico, manera cu e ta intencion pa haci na Aruba, e crudo ta haya un balor mucho mas haltu. E refinaria na Aruba ta bira, den caso di un acuerdo, un di e tresnan na mundo cu por procesa crudo pisa. Esaki ta nifica cu e refinaria lo bira un "manehado di e crudo pisa (cu Venezuela no por bende) pa un crudo sintetico cu si tin un balor economico importante", Koolman a splica. No ta bay produci ningun producto final den e refinaria aki, cu excepcion posiblemente di jet fuel.

Door cu Venezuela no por haci nada cu e crudo pisa, nan no por sigui crece. Nan a studia tur posibilidad, pero niun t'asina atractivo manera lease e refinaria di Aruba. Pa construi un planta pa procesa e crudo na Venezuela mes, lo exigí un inversion di mucho mas di 7 biyon Dollar y por yega na operacion den un poco mas di 5 aña. "Pa casi un decada e economia cu ta depende di petrolio no por sigui crece. Pa diversifica nan economia, lo dura algun aña tambe. Na Aruba, cu un 2 biyon Dollar y den 2 aña di tempo nan lo ta cla pa procesa 150 mil bari pa dia y esey ta loke ta nos asina atractivo," Koolman a trece dilanti.